



**VERSCHNUUFFER**  
[www.verschnuuffer.ch](http://www.verschnuuffer.ch)  
**FASNACHT 2016**

**Was, ich?**

„Was, ich?“ muess ich Di sofort frooge  
falls Du daatsächlich sottisch wooge  
my djeffe Friide z derangiere  
zum fir e Job mi z motiviere.

Mit däm duesch nämmlig sugeriere  
ich dät my Zyt nid optimiere  
und haig drum sicher no Resärve,  
won ich zum Fänschter us kenn wärfe.

Drbii han ich doch ändloos z due  
und bruuch drzue my Porzioon Rue  
zum d Work-Life-Balance kontrolliere –  
ich wott doch kai Infarggt riskiere!

Us heitrem Himmel, aifach so,  
kasch Du doch jetzt nid blötzig ko  
ganz ooni Warnig mi bedränge  
und in e ungewoont Schema zwänge!

Eso spontan han ich – dasch Schaad –  
kai Hammer-Ussreed grad baraad.  
Dass ich nid ka, das lychtet yy,  
nur fällt der Grund mir grad nid yy.

Ich muess no an e Grichtsverhandlig,  
an d Demo gege d Stadtverschandlig,  
ich muess no liberstunde schiebe  
und denn im Fitness Gwicht verbiege.

Me glaubt zwoor nid ich haig das neetig,  
doch ich muess sofort in d Kosmetik,  
ich muess no an e Lychemool,  
in d Klinik wägem Alkoholool.

Drum bin ich morn vermuettlig grangg,  
muess drotzdäm wäge Gäld uf d Bangg,  
und schliesslig muess y – do wirsch lache –  
näbscht „Me-Time“ iizieh, Ferie mache.

Drum: Mit der Geegefroog, der dinne,  
probier ich Zyt zum Dängge z gwinne,  
wo souverän ich iiberbrugg  
und hoff, De ziesch Dy Aafroog zrugg.  
Drzue kunnt froogend no mi Bligg  
- dä find ich sälber bsunders digg –  
eb vilicht nur e Gspässli machsch  
und dä Momänt lutt uuse lachsch.

Im Ärscht kasch jo die Froog nid stelle,  
eb mir äggscht ebbis hälfte welle.  
S stoot s Welle gwiss nie zur Debatte  
das Dängge han ich uf der Latte.

Wär ich der Herr iber my Zyt  
no brächt ich s sicher nid sehr wyt,  
well ich e jeedem sehr gärn hilf  
- nur stoot my Programm denn im Schilf.

Das soorgt fir Spannig und fir Fruscht  
uff das han ich denn gar kai Luscht.  
So muess ich mi vor Ärger schitze  
indäm ich d Aafroog loss abblitze.

So fremdbestimmt sy isch nid glatt,  
es findet sponti nyt mee statt.  
Drfir isch alles, was ich mach,  
perfeggt und schlicht e super Sach!

Ich loss Di wirgglig ungärn hängge,  
Du darfsch nyt Beeses vo mir dängge,  
es tuet mir in der Seel z tiefscht wee  
wenn ich bi Dir d Enttyschig gsee.

De muesch halt dä und sälle frooge,  
vilicht au die emool go blooge,  
wo sunscht per se duesch ignoriere,  
well die Di immer abserviere!

Findsch sicher non e liebe Siech  
wo Dir sehr gärn der Tschumpel miech:  
Wenn s sunscht kain macht isch är als no do  
het drum d Figur vom Quasimodo.

My Arbestlascht muess ich no strääle  
s isch aifach z vyyl, ich ka s nid wääle.  
Drum loon ich s mit em Dichte blyybe  
und loss der Zeedel z Pole schryybe.

---

Au unseri Ladäärne kaasch vom Määntig z'Nacht bis am  
Mittwoch am Morge uff em Minschterplatz bestuune.

---

Bisch e Kind, mechtsch Fasnacht mache,  
denn git's kaini halbe Sache!  
So schrib denn unsere Obmaa aa  
und mäld Di gschwind zem Yyschtooo aa.

Yyneluege: Samschtig 27.02.2016  
14.00-16.00 Uhr im Cliquekäller an dr Malzgasse 9 in Basel

**Mir fraie uns uf Di!**

Fir Informatione mäldsch Di bim Obmaa:  
Pascal Studer, Verschnuuffer Gnepf, Malzgasse 9,  
4052 Basel, email: [gnepf@verschnuuffer.ch](mailto:gnepf@verschnuuffer.ch)